

LO TLAA NKAGELA NTLO

EE NTSENG JANG?

Ke a go leboga, Mokaulengwe Green. Ke tshiamelo. Tumedisoo ko go Mokaulengwe le Kgaitsadi Green, le botlhe ba ba fano mosong ono. Mme ke tshiamelo e ke ikutlwang gore e nneetswe, go tla ko lefelong lena la kobamelo, go dira dikitsiso di le mmalwa.

2 Ga ke batle go tsaya nako ya ga Mokaulegwe Green fano, ka gore ke utlwile Mokaulengwe Green dinako di le mokawana, a bua, mme ka tlhomamo ke ne ka tlhotlheletsega, mme jaaka a ne a tlisa Lefoko la Morena ko go rona, mme a ikobile gore ka ga gone. Maabane o ne a re, “Ga ke amogege Lefoko go tswa ko go Morena jaaka gongwe Le tlaa tla mo tshenolong, jaaka—jaaka Le ne le rometswe, fela,” ne a re, “Ke rata go—go gatelela mo godimo ga se se builweng.” O ne a re, “Jaaka fa Paulo a ne a kwala sengwe mo Baebeleng, ke tla fano go gatelela mo godimo ga se a se buileng.” Ne a re, “Ga ke na molaetsa ope, fela e le go gatelela fela mo godimo ga se se setseng se builwe go tswa ko go Morena.” Jaanong moo go ne tota go gakgamatsa, mo—mogoma yo monnye yo o jalo, a bo a bua, a dira tshwaelo e e jalo.

Jaanong a re nneng fela le lefoko la thapelo ga mmogo.

3 Modimo yo o rategang, ka boutsana ke itse ka foo nka simololang ka teng, gonne ke a ikutlwang gore Wena o fano gompieno, mme mo Bolengteng jwa Gago re tlhola re ikutlwang bannyne thata. Mme ke—ke Go lebogela tshiamelo ena. Jaanong, Morena, gore Wena o re abetse lefelo lena, re rapela gore O tlaa kopana le rona nako nngwe le nngwe fa re kopana fano. Mme mma Mowa wa Gago o Mogolo o tsamaye godimo ga motsemogolo ona! Mma re kgone go tlisa Molaetsa ona wa Efangedi o o neilweng rona le go bewa diatleng tsa rona mo metlheng eno ya bofelo, mma E diragadiwe, mme O tseye mowa mongwe le mongwe wa botho go tswa mo Tucson le gautshwane go dikologa, yo O mo laoletseng Botshelo. Dumelela dilo tsena, Rara, mo Leineng la Jesu Keresete. Amen.

4 Ke akanya gore ke batla go bala temananyana ya Lekwalo fano mosong ono, fela pele ga ke bua mafoko ana a ke eletsang go a bua. E fithelwa ka ko go Ditiro, kgaolo ya bo 7 ya Buka ya Ditiro. Mme a e re le sa bula ko go eo, re tlaa simolola fa temaneng ya bo 44.

5 Jaanong re ya ko Shreveport beke ena, beke e e tlang ena, ka ntlha ya motlhomagang wa ditirelo, mme jaanong re ile go leka, fa Morena a ratile. Mokaulengwe Moore, Mokaulengwe

Jack Moore, tsala e e molemo thata ya ga Mokaulengwe Pearry le nna re le babedi, mme re rata Mokaulengwe Jack. Molaetsa, ke a akanya, o ne wa mo sita ka mohuta mongwe ga nnyennyane, bogolo jang mo dingweng tsa dilo tse re di ratang le go di dumela, tse—tse di tlileng ko go rona ka go bulwa ga Dikano Tse Supa, jaaka re Go dumela, jaaka, “peo ya noga,” le “tshireletso ya Bosakhutleng ya badumedi,” le—le jalo jalo, le mengwe ya Melaetsa eo. Seo, gongwe ko go ba bangwe... Ga re akanye fa Sena se le thata, fela, Sona, o tshwanetse o bulele Boammaaruri pelo ya gago. Re dumela gore re tshela mo na—nakong ya mafelelo. Moo go popota thata ko go rona, gore re fela ko bokhutlong jwa tsela.

⁶ Mme go bua mo kerekeng ya monna mongwe, sentle, o batla go tlhompha kamogelo ya monna yoo, ya—ya go go naya tshono eo go tla ka mo kerekeng ya gagwe. Mme nna, ka tlhomamo, ke itseng gore ga ba dumele mo go Seo, mme ke tlaa ba tlhompha mo go lekaneng gore... Go na le bontsi thata bo nka buang ka jone koo, ko ntleng ga go tlisa Seo mo teng; fa fela e se Mowa o o Boitshepo go direga gore o Se kgarametse ga nnyennyane, lo a bona, ka nako eo ka tlhomamo ke tlaa bua jaaka A buile. Mme ga ke itse botoka bope go na le go dira seo, eibile ke a tshepa ga nkitla ke ithuta botoka bope go na le go dira seo. Lo a bona? A re Go bueng fela ka tsela e A Go buang ka gone.

⁷ Jaanong a re baleng fela te—temana kgotsa tse pedi fano go tswa mo kga—kgaelong ya bo 7 ya Buka ya Ditiro, go simololeng ka temana ya bo 44.

Borraetsho ba ne ba na le motlaagana wa tshupo mo nageng, jaaka a ne a laotse, a bua le Moše, gore o tshwanetse go o dira ka ha setshwanong se a kileng a se bona.

O le ona rraaronona o o tsileng ko morago a o gorogisitseng a na le Jesu ko bosweng jwa Baditšhaba, ba Modimo o ba lelekileng ha pele ga matlho a borraetsho, go tla go fitlha metlheng ya ga Dafita;

Yo o boneng letlhogonolo mo matlhong a Modimo, mme a lopa gore a bonele Modimo wa ga Jakobo motlaagana.

Fela Solomone a mo agetse ntlo.

Lefa go ntse jalo Mogodimodimo ga a age mo ditempeleng tse di agilweng ka diatla; jaaka go bua moporofeti,

Legodimo ke setulo sa me sa bogosi,... lefatshe ke sebeo sa dinao tsa me: lo tlaa nkagela ntlo e e ntseng jang: go bua Morena: kgotsa felo ga me ga boikhutso ke gofe?

A diatla tsa me ga di a dira dilo tsena tsotlhe?

⁸ Mo godimo ga Sena, palo ya Lekwalo lena, ke batla go bua mafoko a le mmalwa a ke batlang go a bua pele ga Mokaulengwe Pearry a tlisa molaetsa wa moso.

⁹ Ke bona sena e le nngwe ya metsotso e megolo ya ketelo ya me ko Tucson. Ke tla fano gobane ke ne ka etelelwa pele go tla kwano. Ke tla fano gobane Mowa o o Boitshepo, ka pono, o nthomile fano. Ke a itse moo go ka nna ga lebega go gakgamatsa, gongwe. Fela Ene, jaaka ke itse, sengwe se ke se itseng ka ga Modimo, ke ne ka rongwa fano ka pono ko Tucson. Ke ne ka ipotsa ka foo le ka nako nngwe ke ileng ka rongwa ko lefelong lena la sekaka. Mme fong fano fa go nang le . . .

¹⁰ Go bua ka semowa, mo motsemogolo, ga ke itse ka lefelo lepe le le suleng thata mo semoweng, go na le mo motsemogolong wa Tucson. Go na le ntwa magareng ga dikereke. Go na le ditlhathharuane magareng ga diphuthego. Ga go na kopano, mme mongwe le mongwe a swapola, le go tshwara, le go pitlaganya, mme ba leka go tsaya mongwe *yona*, le go tlhotlheletsa batho ba bangwe ba amogelete ditumelo tsa bone. Ke sekaka, go bua ka semowa, gape.

¹¹ Fela ka nako eo ke ne ka bala mo Baebeleng, gore fa Modimo a neng a biletsha Moše kgakala go tloga baratiweng ba gagwe le gotlhe mo go neng go ratega thata ko go ene, mme a mo romela ko bogareganaga, go kwala Melao ya Baebele. Moo e ne e le Kgolagano e Kgologolo, Dibuka tsa ntlha tse nnê, Genesise, Lefitiko, le Doiteronomio, Ekesodu. Ene . . . Ga ke a ka ka di bua fela go tlhomagana, fela moo ke Dibuka tse nnê. Tsone tota e leng Kgolagano e Kgologolo. Ka gore, tsotlhe tse dingwe tsa Yona e ne e le tse baporofeta ba di buileng, mo Dipesalomeng tsa ga Dafita, le jalo jalo, fela Ditiragalo tsa dikgosi. Fela sena e ne e le metheo ya Kgolagano e Kgologolo. Ne e le Moše a di kwadileng morago ga gore a bidiwe go tswa legaeng la lefatshe la gagwe, kwa a tsholetsweng teng le go godisetswa mo bathong ba gagwe, a bo a rongwa ko sekakeng, go kwala Buka ena ya Kgolagano e Kgologolo.

¹² Fong ke fitlhela gore mo Bukeng ya Kgolagano e Ntšhwa, kwa Paulo, yo e leng mosimolodi, kgotsa eseng mosimolodi, fela mokwadi wa Kgolagano e Ntšhwa. Le ene o ne a lelekwa go tswa mo bathong ba gagwe, mme, ka Mowa, go ya ko Arabia, kwa a neng a le dingwaga tse tharo le sephatlo, go batla tlhotlheletso. Mme Paulo ke mokwadi mogolo wa Kgolagano e Ntšhwa. Jaanong, go na le Mathaio, Mareko, Luka, le Johane, fela e ne e le bakwadi ba ba kwadileng fela se Jesu a se buileng jaaka ba ne ba Mo setse morago le ene. Mme, fela, o tsaya Buka ya ga Timotheo, le go Baroma, le go Bahebере, le jalo jalo, Paulo o amogetse tlhotlheletso go kwala Kgolagano e Ntšhwa; a tsaya Kgolagano e Kgologolo yotlhe jaaka moriti, a bo a e rulaganya. Mme Modimo o ne a e tlhompha, a ba a e dira Kgolagano e Ntšhwa.

¹³ Mme jaanong fa Kgolagano e Kgologolo e ne e tshwanetse go lelekwa go tswa mo . . . mokwadi o ne a tshwanetse go lelekwa go tswa mo bathong ba gagwe, go ya mo bogareganaga, go tsaya tlhotlheletso go kwala Kgolagano e Kgologolo. Mme mo Kgolaganong e Ntšhwa, mokwadi o ne a lelekwa ke Mosimolodi, go ya mo lefelong la sekaka, go tsaya tlhotlheletso go kwala Kgolagano e Ntšhwa. Mme Dibuka di kanetswe ka Dikano Tse Supa; go tlaa batla gape se se tshwanang, ke a dumela, mo metlheng eno, go bula Dikano Tse Supa tseo. Go tlogela se o se ratang thata, go se o se ngomaelang, le legaenyana le ke neng ka le newa ke batho, le mo gare ba batho ba me botlhe le ditsala, le kereke e e neng e tlhogonolofala, mme e sena sepe se se tlhaelang; mme go—go tlogela seo, ke itlosa ka bonako mo go sone, ke bo ke sutela kgakala, ko ntle ko sekakeng kwa o neng o sa itse ope, le sengwe le sengwe kgatlhanong le wena.

¹⁴ Fela go na le sengwe ka ga Modimo, gore O isa motho go direng dilo tse di fetileng go akanya gope mo e leng ga gagwe, gore go tle go nne kgalalelong le tlhomphong ya Modimo. Mme ke ikutlwaa gore, eseng boitlhompho, fela ke—ke ikutlwaa e le tshiamelo gore e ne e le go tlogela sengwe le sengwe se se neng se bitswa mo go rategang thata mo go nna, go tsena fano ka mo bogarengganaga jona ke bo ke boga jaaka ke ise a ko ke boge mo botshelong jwa me, fano mo bogarengganaga jona, kgotsa sekaka sena. Fela ke a dumela, gore mo go direng seo le go utlweng se Modimo a se laetseng gore se dirwe, Modimo o re buletse masaitseweng a motlha ono. Mme re fano ka Molaetsa ona.

¹⁵ Jaanong, go ne go na le batho ba le bantsi ba ba neng ba ntshetse morago, mme moo ga se mo go sa tlwaelesegang. Ka gale motho yo re . . . Batho ba a ratana, mme lone, lorato, lo tlaa go isa ko go direng dilo tse o gopolang o ka seke o di dire. Mme ba le bantsi ba lona lo tlogetse magae a lona, le tlogetse gotlhe, fela go tsamaya, go tlaa fano mo sekakeng.

¹⁶ Ba le bantsi ba nteleditse, ba le bantsi ba mpoditse, “A re tle ko Arizona? A e tlaa nna lefelo le le siameng mo go rona?” Sentle, jaaka go builwe ka ga Moše le bone, e ne e se lefelo la maungo, e se lefelo la digaranata.

¹⁷ Fano ga go na tiro e ntsi go dirwa, mme go tshela go ko godimo, mme tlhwathlwa ya go tshela e ko godimo. Ke lefelo tota le le makgawekgawe go tshela, ke Tucson, Arizona; dituelo di maswe, mme—mme dijо di ko godimo, le khiriso. Ke—ke lefelo le le maswe go tshela, mo mokgweng oo. Fela le itekanetse, le omeletse. Mme rona motlhamongwe . . . Ga re a tshwanelaa go tsaya menagano ya rona gore e bopege mo dilong tsa lefatshes lena.

¹⁸ Re tshwanetse re lebelele ko ketolelong pele ya Mowa o o Boitshepo. Fela selo se le sengwe se se ntshwentseng mo go tleng fano, le go bolelala batho, sentle, “ga lo a tshwanelaa go

tlā” kgotsa “lo tshwanetse lo tlē,” seo ke se tlogelela motho mongwe le mongwe a le nosi, tsela e Modimo a etelelang motho yoo a le nosi go dira. Ke akanya gore mongwe le mongwe wa rona o tshwanetse a dire seo, go gogwa ke Mowa, mo go se o tshwanetseng go se dira.

¹⁹ Mme ba le bantsi ba lona fano lo tswa gautshwane le Jeffersonville, le ba phuthego koo, mme lo tlie kwano. Jaanong, selo se se ntshwentseng, ne e le lefelo la kobamelo.

²⁰ Mme ke a lemoga, jaaka ke badile mo Lekwalong fano, ka ga Setefane le go bua ga gagwe fela pele ga loso la gagwe; gonne ba ne ba mo kgobotletsa ka bonako morago, ka ntlha ya molaetsa wa gagwe. Jaaka a ne a bua, o ne a re, “borra etsho,” a bua ka ga Bahebereg mo metlheng ya pele, ka foo gore ba lekileng go batla thekegelo fa pele ga Modimo, go agela kobamelo lefelo. O rile gore, “Solomone o Mo agetse ntlo, kgotsa kago.” Re tlwaelanye le polelo.

²¹ Fela ke rata mafoko a gagwe a latelang, “Le fa go ntse jalo Mogodimodimo ga a age mo matlong a a agilweng ka diatla,” le lefelo lengwe ka ko go Isaia. O rile, “O Mpaakanyeditse mmele; lo a bona, ditlhabelo le ditshupelo, le dikago, le jalo jalo, fela O Mpaakanyeditse mmele.” Sentle, re a lemoga gore o ne a bua ka nako eo ka ga mmele kwa Modimo a neng a le ka fa motlaaganeng, mo go Keresete.

²² Fela ke a dumela gompieno, gore tlhotlheletso e e tlileng ko go—ko go Mokaulengwe Green, go fudugela kwano, ene le Kgaitzadi Green, ba aba lefelo la bone ko morago ko botlhabatsatsi, gape, le gone, ko morago ko Texas, go tla fano le . . . go simolola ka bosengsepe; fela ntle ga bothata ka tlhotlheletso, ba ikutlwā gore ba tshwanetse ba go dire. Ke itumelela banna ba ba tlaa latelang ketelelo pele ya ga Keresete, go sa kgathalesege ka ga tlhwatlhwā e go e ba lopang.

²³ Le ntswa lefatshe lotlhe, gongwe ditsala tsa gago tse di gaisang thata, ba gopola gore o phoso, fela ga go phoso ko go wena. Fa o santse o ikutlwā gore go na le sengwe ka fa morago ga gone, ke Modimo a go tsamaisang; ga go ke go nna phoso, mme go tlaa tlholā go felelela sentle.

²⁴ Bonang banyalani ba ba nnye ba, lekau le le nang le talente. Ga ke bue sena ka gore o ntse fano. Le motheba yona le bana ba gagwe, le lelwapa la gagwe go le godisa, mme o tlogetse mmereko wa gagwe le sengwe, go fudugela kwano.

²⁵ Ke a lemoga gore dingwaga tse di mmalwa tse di fetileng ke ne ka biletswa mo bodireding. Ga ke ise ke dire modisa yo o atlegileng, ka gore ke na le mowa o o kgarakgatsegang, o o kailang. Ga ke kgone go thethebala gope. Fela le fa e le kae kwa Mowa o yang teng, ke tshwanetse fela ke tsamaye le One, ka gore ke na le Molaetsa. Jesu o rile, “Ke tshwanetse ke rere mo toropong e nngwe ena gape.”

²⁶ Fela go na le bao ba e leng badisa ba ba tlhokomelang letsomane. Ke itumela thata gore Mokaulengwe Pearry o latetse ketelelo pele ya Mowa o o Boitshepo, mme gompieno re na le motlaagana. One ke o monnye. Oo o molemo fela go lekana go simolola ka one, go bona se Mowa o o Boitshepo... Re sa itseng, a re tsamayeng fela kgato ka kgato. Jaanong, ke a dumela, fa e le gore Modimo o buile le Mokaulengwe le Kgaitsadi Green, go tla kwano, a bo a bula lefelo kwa bana ba rona; mo boemong jwa gore mosong wa La Tshipi ba palame dibaesekele tsa bone, le mo mebileng ba bo ba siana siana, ba na le lefelo go tla ba obamela, mo boemong jwa rona re ntse gautshwane re reeditse sengwe se re se utlwileng mo seromamoweng, e leng mo go siameng.

²⁷ Fela rona, jaaka setlhophapha sena sa batho, re na le Molaetsa wa letsatsi lena. Rona, re dumela gore Modimo o re neile Molaetsa. Mme Mokaulengwe Green, ke, ga ke batle go mmitsa mopati, ka gore re... Sentle, ke gone, gape, mopati, re mmogo mo Molaetseng ona. Mokaulengwe Green o rera selo se se tshwanang le Molaetsa o ke dumelang mo go one. O tlogetse legae la gagwe, o tlogetse batho ba gagwe, o tlogetse kereke ya gagwe. O ne a le, ke a dumela, o ne a le mookamedi wa kgaolo kgotsa sengwe, wa lengwe la makgotla, a bo a neela selo sotlhe fa a ne a utlwa Sena. O tlogetse sengwe le sengwe se se neng se ratega thata mo go ene, gape, go tla ko sekakeng, fela go etleetsha se Modimo a se re nayang jaanong.

²⁸ Ka re ke a dumela ga o a tshwanela fela go nna mo dipelong tsa rona, e tshwanetse go nna boikarabelo jwa rona go mo ema nokeng, sengwe le sengwe se re ka se kgonang, go tsenelela ditirelo, go tla kwano go obamela, le go dira sena lefelo kwa Modimo a ka re senolelang dilo tse A di re tsholetseng go di senola. Mme jaaka lefoko la gagwe le rile, "Molaetsa ga o tle ko go nna ka go newa ga tlhotlheletso, jaaka o dira gongwe ko go bangwe ba rona, fela," o ne a re, "ke fano go ema nokeng se Modimo a se neileng." A puo! Mme ke a dumela, fa rotlhe re ka berekisanya mmogo, re tlaa baya dipelo tsa rona ko go gone.

²⁹ Ke a itse mongwe le mongwe wa lona, fa o ikutlwa jaaka ke dira, ke tshwerwe ke tlala gore go bona Mowa wa Modimo o tsamaya, ga ke kgone fela ka boutsana go go itshokela. Maitemogelo mangwe ke mnile fela le one ko godimo ko thabeng, fela go utlwa seo gangwe gape, Sengwe seo se e leng gore motlheng ke ne ke pholoswa la ntlha ne go galalela gore ko pelong ya me! Mme re kgona go tla ka mo lefelong, re kgona go nna re bo re go bona mo gare ga rona, gore re a omelela. Jaaka re nna fano mo sekakeng, ke tsena mo gare ga bakaulengwe ba me, ba bua le nna ka bo ke bua le bone; ka gale, mo tselanyaneng ya go tlhokomela, ke ikutlwa ko ntle koo le Mowa, jaaka go ne go ntse, go bona fela seemo sa mokaulengwe yole, go bona se se phoso. Ke simolola go utlwa rotlhe re ikaega, re katoga Mowa. Go nna selo se se tlholego thata ko go rona. Re tshwanetse re obamele

mo Moweng, kwa Mowa wa Modimo . . . eseng fela Molaetsa wa rona o tshwanela go nna kgabo ya oura, o tshwanetse o nne kgabo mo dipelong tsa rona. Lo a bona? O tshwanetse o nne mo dipelong tsa rona, kgotsa ga re kake—ga re kake ra O neela batho ka tshiamo. Mowa o tshwanetse o rwale Molaetsa, ka Boone. Mme ke a tshepa le go dumela mo go mongwe le mongwe wa lona, go nna Mokeresete tota.

³⁰ Jaanong ba tlhoka barutabana ba sekolo sa La Tshipi. Ba ile go tlhoka badiri. Mme ke batla go bua sena gore lo tle lo tlhaloganya ka botlalo. Ena ke kereke ya me.

³¹ Ke ntse ke le fano dingwaga tse tharo. Mme ke nnile le mojako o le mongwe o buletswe nna, yoo e ne e le Mokaulengwe Mack ne a nkopa go tla go rera. Modimo a mo segofatse. Ga ke ise ke laletswe ke batho bape ba sele; eseng sepe kgatlhanong le bone, bone ba siame. Mokaulengwe Brock, tsala ya me e e molemo, Mokaulengwe Gilmore, ba le bantsi ba bakaulengwe bana ba Mapentekoste fano, ke ditsala tota, tota tse di boteng tse di siameng tsa me. Ke a ba rata; ga go sepe kgatlhanong le bone. Ke tlhaloganya maemo a bone. Ga ba kake ba ntaletsa teng koo, mme ka lobaka loo ba sale mo lekgotleng la bone. Lo a bona, ga ba kake ba go dira. Ka gore, fa ba dira, ba ragelwa ko ntle. Jalo lo bona maemo a bona. Ke ne ke na le selo se se tshwanang go lebagana naso. Fela, ija, mma ka gale go nne, “Batlang pele Puso ya Modimo,” thato ya Modimo.

³² Mme jaanong gore, Mokaulengwe Green, Modimo o mo romile mono a bo a re bulela kereke ya Tumelo e e tlhokegang e e tshwanang jaaka ya rona e re dumelang mo go yona, re tshwanetse re leboge Modimo thata, mme re tsenelele tirelo nngwe le nngwe, re tseye lefelo lengwe le lengwe le re ka le kgonang. Mme fa re kopiwa go tla go bitsa, go rapela, go batla, go dira, a re nneng masole gone fa . . . fela re khidiega go go dira. Lo a bona?

³³ Tshegetsang Molaetsa o tlotleba, mme lo tsheleng botshelo jwa mohuta o o siameng. Se letleleleng phori epe e tle mo go Lone. Re tshela mo go thari thata jaanong. Re—re thari thata mo oureng. A re Le tsheleng mo go phepa. Sental, botshelo jwa me, botshelo jwa gago, otlhe a matshelo a rona a tlhoka go nopolwa, fa pele ga Modimo.

³⁴ Banana ba rona ba palama fela go dikologa, go tloga lefelong go ya lefelong, go tloga tshupeetsong go ya tshupeetsong, mme ba timelela kgakala le kgakala go tswa mo Modimong. Gone. Jaanong, moo ke boamaaruri. Ke go bona mo go banake, eibile ke ipona ke fitlha ko lefelong kwa go seng . . . Lona, lo tshwanetse re iphuthe ga mmogo, go obamela Modimo; Baebele e buile jalo, “Fa re bona motlha ona o atamela, mo gontsi ga kalo tlayang ga mmogo.” Fa go le fela batho ba le babedi fano, o nne mongwe wa bone. Jaanong moo ke . . . Mme fa re tla ga mmogo re bo re

obamela ga mmogo, ka nako eo rona fela, sengwe se sele ka ga sone, Jesu o rile, "Kwa bobedi kgotsa boraro bo phuthegileng ka Leina la Me, foo Ke teng mo gare ga bone."

³⁵ Jaanong, jaaka ke buile pele, Mokaulengwe Green o mpoleletse, mme o go buile. Mosadi wa me o tlide, a mpolelala se a se buileng fa ke ne ke seyo. Gore, mme o buile mosong ona, "Felo ga therelo go ne go butswe ka nako nngwe le nngwe." Jaanong ka gale... Moo, go buletswe nna go bua.

³⁶ Jaanong, ka gale, ke ne ke tshwanetse go kgweetsa tsela yotlhe go ya ko Jeffersonville, Indiana, go neela Molaetsa o Modimo a o nneetseng, go o tlisa ko bathong; tsamaya tsela yotlhe go ya ko Jeffersonville, Indiana, le mongwe le mongwe wa lona lo fololega go kgabaganya lefatshe, mme lo gokaganya megal a dilo, go tsaya Molaetsa, ka gore ke se re tshelang ka sone. Lo a bona, ke se re se tletseng fano. Sental, ga re tshwanele go tlhola re dira jalo.

³⁷ Modimo o nneela Molaetsa, nka tsamaela gone kwano ko felong ga therelo a bo ke o rera, a bo ke ikutlwa ke gololesegile go go dira. Eya. Mme ke a dumela, ka seo, gore Modimo Mothatiotlhe o tlaa le segofatsa fa lo tla ema fela le kereke ena jaanong, setlhophha sena sa batho. Eseng fela seo, fela a re tsweleng ko ntla mme re boneng re ka se bone ba bangwe go tla mo teng. Lo a bona, a re bueng le bangwe gongwe le gongwe, re bueng le bone ka ga kereke ya rona le se e se kayang. Se kereke ya rona... Re fano. Re batla lo tleng, tlisang baeng, mme ke tlhomame go tlaa nna molemo ka ntlha ya rona rotlhe. Lo a bona? Re na le kago, e re e lebogelang. Re lebogela lefelo lena, go phuthega ga mmogo.

³⁸ Fela, "Le fa go ntse jalo Mogodimodimo ga a age mo ditempeleng tse di agilweng ka diatla, lo a bona, 'Gonne Legodimo ke setulo sa Me sa bogosi, mme lefatshe ke sebeo sa dinao tsa Me; mme felo ga Me ga boikhutso ke gofe? Fela mmele O Mpaakanyeditse ona.'"

³⁹ Mme re Mmele wa ga Keresete. Jalo jaaka re sutu go tloga kagong e le nngwe go ya kagong e nngwe, ke a dumela, mo go tliseng Melaetsa ya rona, mme re tlaa fologa re bo re nna le ditirelo tsa diphodiso. Mme sepe se Morena a se re senolelang go se dira, re tlaa nna le sone gone fano mo kerekeng, go fitlhela e gamakela botona ga kana lo tlaa tshwanelang go e isa golo gongwe go sele, le golo gongwe go sele, go fitlhela Jesu a tla. Modimo a le segofatse.

⁴⁰ [Mokaulengwe Pearry Green o a akgela, mme ka nako eo o kopa Mokaulengwe Branham go mo tshwaela. Fa go sa theipiwang mo theiping—Mor.]

A re obeng ditlhogo tsa rona.

⁴¹ Modimo yo o rategang, jaaka re eme fano mo seraleng sena, se se emetseng, gone ka kwa ga aletareng fano, re a lemoga gore

re lo—losika le le swang la batho, go ya fa lefatsheng lena le amegang gone. Re lebelela ko ntle mo mebileng mme re bona boleo bo kwadilwe gongwe le gongwe, le gore Kgalalelo ya Morena e tloga ka bonako. Mme re a itse, motlheng Kgalalelo ya Morena e ya ko godimo, le jalo Kereke e tlaa tsamaya le Yone. Modimo, re batla go nna koo.

⁴² Fela malatsi a mmalwa a a fetileng, ke eme fano mo kgogometsong ya mmila, fela go kgabaganya mmila, ke lebeletse mofôlô oo o fologa le mmila; le go bona ditanka tseo tsa kgale tsa Ntwa ya Ntlha di eteletse mo tseleng, ga tloga ga tla tanka e tona e e bokete ya Shereman, ko morago ga eo ga latela go tswelela le go tswelela le go tswelela, ga tloga ga latela bommê ba naledi ya gauta; lewapanyana le le thubegileng, ka mosadi yo o lelang, le mosimanyana yo o makgawekgawe a tlhokafaletswe ke rraagwe, mma yo o godileng o tlhokafaletswe ke morwa. Ke ne ka gopola, “Ka foo go hutsafatsang ka teng,” go ema mo kgogometsong ya mmila mme ke lebelele sengwe jaaka seo se feta. Ka nako eo fa ke ela tlhoko, fela jaaka ba feta kago ena, moopelo o ne wa fetogela go *Tlhabelang pele, Masole A Bakeresete*. Ba tshameka megwanto ya bona, ko morago; fela erile ba feta lefelo lena!

⁴³ Modimo yo o rategang thata, ke akanya ka ga nako e nngwe e kgolo e e tlang, mme eo e tlaa bo e le tsogo, motlheng mabutswapele a tlaa tswang pele, baitshepi, ditlhogo tsa lets. “Gonne rona ba re tshelang mme re setse ga re kitla re kganelia kgotsa re thiba bao ba ba robetseng; gonne terompeta ya Modimo e tlaa lets, mme baswi mo go Keresete ba tlaa tsoga pele.” Ka nako eo fa re bona mo go golo moo... fela batho ba tsamaya, ba gwanta go ralala mawapi; mme re tlaa bo re eme, re letetse phetogo ya rona, re itse gore re tlaa fola mo moleng, le rona. Modimo, re dire masole a a boikanyego.

⁴⁴ Fela bao ba ba amanyeng tota eibile ba kile ba nna mo ntweng ba tlaa itse mo seo go se kayang tota, go bona ditanka tseo di pitika. Mme, Modimo, re akanya gore bao ba ba nnileng mo tlhabanong ya botshelo ba tlaa itse se go se kayang, fa re letile nako ya rona go tsena mo maemong le lefelo, mo tsogong, go ya godimo.

⁴⁵ Mme sena, mokaulengwe wa me yo monnye, a eme fano, a katisitswe sentle, a ipaakantse, a apere, a letetse monnamogolo go tlhoma diatla mo go ene, mongwe yo a leng lebutswapele la kgale go tswa godimo kwa mo moleng o o ko pele, a itse gore o tshwanetse a ipataganye le tlhabano, le ene. Modimo yo o rategang thata, ka diatla tse di sa tshwanelweng tsena ke di tlhoma mo mokaulengweng wa me, mo kemeding ya tsa Gago. Segofatsa Mokaulengwe Green, Modimo yo o rategang thata, yo ke mo segofatsang mo Leineng la Jesu. Mma a tshole Molaetsa ona, Morena, go ya mo motsemogolong ona le fa e ka nna kae kwa O tlaa mmiletsang teng. Mma a ikanyege, a tladiwe ka Mowa, a tshela botshelo jo bo ko godimo ga kgobo. Modimo, a a nne

le dipelo tsa batho, gore a tle a ba rute le go ba etelela pele le go ba kaela mo tselaneng e rotlhe re eletsang go e tsamaya. Go dumelela, Morena.

⁴⁶ Segofatsa mosadi wa gagwe yo a ikanyegang, bananyana ba gagwe. Segofatsa maiteko a rona fano ga mmogo, jaaka bakaulengwe ba Bakeresete fano mo lefatsheng, gore re tle re ise Efangedi ena ko dikhutlong tsa lefatshe. Romela Mowa wa Gago mo go ene, Modimo. Re a rapela mo Leineng la Jesu Keresete, jaaka re mo neela ko go Wena. Amen.

Modimo a go segofatse, Mokaulengwe Pearry. Tshola Lefoko la Modimo!



LO TLAA NKAGELA NTLO E E NTSENG JANG? TSW65-1121
(What House Will You Build Me?)

Molaetsa o ka Mokaulengwe William Marrion Branham, o ne wa rerwa la ntlha ka Sekgowa mo mosong wa Letsatsi la Tshipi, Ngwanaitsele 21, 1965, kwa Motlaaganeng wa Tucson ko Tucson, Arizona, U.S.A, o tserwe mo theiping ya makenete mme wa gatisiwa ka Sekgowa o sa khutswafadiwa. Phuthololo e ya Setswana e gatisitswe le go abiwa ke ba Voice Of God Recordings.

TSWANA

©2017 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org